

## **O‘ZBEKISTON RESPUBLIKASIDA YOSHLARGA OID DAVLAT SIYOSATINING O‘ZIGA XOS XUSUSIYATLARI**

**F.B.Hayitova**

*TDPU dotsent v.b.*

**S.H.Saidova**

*TDPU talabasi*

Annotatsiya. Mamlakatimizdagi islohotlarning asosida yoshlar masalasiga e‘tiborning dolzarbligi va yoshlarni islohotlar va yaratilayotgan imkoniyatlardan xabardor qilishga qaratiladi. Yoshlarga oid davlat siyosatining ustuvor xususiyatlari, mamlakatimizda mustaqillikdan keyingi yillar davomida ushbu sohada amalga oshirilgan islohotlarning qisqacha talqini, Prezidentimiz Shavkat Mirziyoyevning BMT 72-sessiyasida so‘zlagan nutqida keltirilgan yoshlar masalalari bayon etildi.

Kalit so‘zlar. Yoshlar, yoshlarga oid davlat siyosati, BMT ning 72-sessiyasi, demokratik taraqqiyot va modernizatsiya, “Yoshlar Ittifoqi”, Yoshlar ishlari agentligi.

Mamlakatimiz demokratik taraqqiyot, modernizatsiya va yangilanish borasida belgilangan maqsadlarga erishishda eng muhim hal qiluvchi kuch bo‘lgan bilimli avlodni tarbiyalash vazifasini o‘zining ustuvor yo‘nalishlari qatoriga qo‘yib kelmoqda va amalga oshirilayotgan islohotlarning markazida inson- jamiyat-davlat uchligi mustahkam o‘rin olgan. Davlat Statistika qo‘mitasining ma‘lumotlariga ko‘ra, 36 milliondan ortiq aholining 67%ini yoshlar, ya‘ni 18 yoshdan 30 yoshgacha bo‘lgan shaxslar tashkil etadi. (2013-2014 yillarda bu ko‘rsatkich 35%ini tashkil etgan).

Yoshlar - har bir davlatning eng katta boyligi va taraqqiyotni harakatga keltiruvchi kuchi ekanligi nuqtai nazaridan Yoshlarga oid siyosat O‘zbekiston Respublikasi davlat faoliyatining ustuvor yo‘nalishlaridan biri bo‘lib kelmoqda. Albatta yosh avlodni yetuk, malakali kadr qilib tarbiyalashda ta‘lim- tarbiyaning roli nihoyatda kattadir. Yoshlarning ongu tafakkurini ma‘rifat asosida shakllantirish va tarbiyalashni eng muhim vazifa sifatida belgilagan Prezidentimiz Shavkat Mirziyoyev BMT ning 72-sessiyasida: Bugungi dunyo yoshlari-son jihatdan butun insoniyat tarixidagi eng yirik avloddir, chunki ular 2 milliard kishini tashkil etmoqda. Sayyoramizning ertangi kuni, farovonligi farzandlarimiz qanday inson bo‘lib kamolga yetishi bilan bog‘liq. Bizning asosiy vazifamiz-yoshlarning o‘z salohiyatini namoyon qilishi uchun zarur sharoitlar yaratish, zo‘ravonlik g‘oyasi “virusi”tarqalishining oldini olishdir. Buning uchun yosh avlodni ijtimoiy qo‘llab- quvvatlash, uning huquq va manfaatlarini himoya qilish borasidagi ko‘p tomonlama hamkorlikni rivojlantirish lozim, deb hisoblaymiz. Shu munosabat bilan, O‘zbekiston globallashuv va axborot kommunikatsiya texnologiyalari jadal rivojlanib borayotgan bugungi sharoitda yoshlarga oid siyosatni shakllantirish va amalga oshirishga qaratilgan umumlashtirilgan xalqaro huquqiy hujjat-BMTning “Yoshlar huquqlari to‘grisida”gi xalqaro konvensiyani

ishlab chiqishni taklif etadi . Demak yoshlar uchun barcha imkoniyatlarni yaratishga faqatgina mamlakatimiz emas, balki butun dunyo mas’ul ekanligini ta’kidlash lozim.

O’tgan yillar davomida mamlakatimizda yoshlarga oid islohotlarga nazar soladigan bo’lsak:

- 1996-yilda “Kamolot” yoshlar jamg’armasi tuzilib, jamg’arma 2001-yilda “Kamolot” yoshlar ijtimoiy harakatiga aylantirildi.

- 2017 yil 30 iyun sanasida Prezident Qaroriga asosan, “Kamolot” yoshlar ijtimoiy harakati “Yoshlar Ittifoqi” etib qayta tashkil etildi.

- 2016-yilda “Yoshlarga oid davlat siyosati to’g’risida”gi qonun qabul qilindi. Ushbu qonunning qabul qilinishi mamlakatimizda yoshlarning huquqlari va qonuniy manfaatlarini mustahkamlashga, yoshlarga oid davlat siyosatini ro’yobga chiqarishda davlat organlari va boshqa tashkilotlar mas’uliyatini kuchaytirishga, ushbu sohada sog’lom, barkamol avlodni tarbiyalashga qaratilgan chora-tadbirlar samaradorligini yanada oshirishga xizmat qiladi.

- Yoshlar bilan bog’liq muammolarni yechish, iqtidorli yoshlarni rag’batlantirish maqsadida 2020-yil 20-iyundagi PF-6017-son farmoni bilan Yoshlar ishlari agentligi tashkil etildi va 30-iyun sanasi “Yoshlar” kuni sifatida nishonlanib kelinmoqda. Yoshlarni Vatanga sadoqat, milliy va umuminsoniy qadriyatlarga hurmat ruhida tarbiyalash, o’sib kelayotgan yosh avlodni ilm-fan va innovatsiyalarga keng jalb etish, ularni „Milliy tiklanishdan —milliy yuksalish sari!“ g’oyasi atrofida birlashtirishga qaratilgan chora-tadbirlarni belgilash, shuningdek, iqtidorli yoshlarni yetakchi xorijiy oliy ta’lim muassasalariga ta’lim olish uchun yuborish, xalqaro tanlovlarda ishtirok etishini ta’minlash, yosh avlodni madaniyat, san’at, jismoniy tarbiya va sportga keng jalb etish, ularning axborot texnologiyalari bo’yicha savodxonligini oshirish, yoshlar o’rtasida kitobxonlikni targ’ib qilish, xotin-qizlar bandligini ta’minlash vazifalarini qamrab olgan beshta muhim tashabbusni keng joriy etishga qaratilgan ishlarni muvofiqlashtirish, ularning intellektual salohiyati va iste’dodini rivojlantirish agentlikning muhim vazifalaridan biri sifatida belgilab qo’yildi.

- Joriy yilda davlat oliy ta’lim muassasalari bakalavriatining kunduzgi ta’lim shakliga kirish imtihonlarida eng yuqori ball to’plagan 200 nafar yoshlar uchun davlat byudjeti mablag’i hisobidan moliyalashtiriladigan O’zbekiston Respublikasi Prezidenti granti joriy etildi.

- Xotin-qizlarning ta’lim va kasbiy ko’nikmalar olishi hamda bandligini ta’minlashga har tomonlama ko’maklashish maqsadida Mahalla va oilani qo’llab-quvvatlash vazirligining tavsiyanomasiga ega bo’lgan xotin-qizlar uchun davlat granti asosidagi qabul ko’rsatkichlari ajratilib, ehtiyojmand oilalar farzandi bo’lgan xotin-qizlar uchun ajratilgan davlat grantlari soni 2 barobarga oshirish orqali 2000 taga yetkazildi.

- Prezidentning aholi o’rtasida kitobxonlikni targ’ib qilish borasidagi tashabbusiga asosan «Yosh kitobxon» respublika tanlovining an’anaviy ravishda o’tkazilishi yo’lga qo’yildi. Respublika tanlovida g’olib bo’lganlarga Prezident sovg’asi – «Spark» avtomobilining berilishi ko’plab yoshlar uchun kitobxonlikka motivatsiya vazifasini o’tab kelmoqda. Maqolada amalga oshirilayotgan islohotlar haqida qisqacha to’xtalib o’tildi. Biz

yoshlarga berilayotgan imkoniyatlar talaygina, undan o'z vaqtida foydalanish uchun faqat bilim va mahorat talab qilinadi xolos, ya'ni egallayotgan kasbimizning malakali mutaxassisi bo'lib, yurtimizni farovon va yuksak demokratik davlat bo'lishiga hissa qo'shishimiz lozim. Albatta islohot- islohot uchun emas, avvalo inson va uning manfaatlari uchun xizmat qilmog'i lozim. Yoshlarga shunday imkoniyatlar yaratilar ekan, biz ham ularga munosib bo'lib shakllanishimiz lozim deb o'ylayman.